



Centar za zastupanje  
građanskih interesa

(Sarajevo, 5. januar 2012.) - Fondacija CPI – Centar za zastupanje građanskih interesa neugodno je iznenađena reakcijom iz ureda Predsjedavajućeg Vijeća ministara g. Vjekoslava Bevande od 4. januara kao i optužbom da dezinformiramo javnost, prije svega iz razloga što pomenutom kabinetu činjenice ne idu u prilog.

Naime, na službenim stranicama MMF-a nalaze se dva Pisma namjere, koje je Vijeće ministara dostavilo ovoj finansijskoj instituciji vezano za stand by aranžman, od kojih jedno datira 11. septembra 2012., a drugo 6. decembra 2012. Ova dva pisma se razlikuju u nekoliko bitnih tačaka, s time da je drugo pismo čak i naslovljeno kao “Dodatno pismo namjere” (Supplementary Letter of Intent) i u svojoj tački 2. kaže:

"Ostajemo posvećeni implementaciji mjera (politika) opisanih u našem Pismu namjere datiranom 11. septembra 2012. Ovo Dodatno pismo namjere pruža informaciju o našim nedavnim naporima i dostignućima, kao i o dodatnim mjerama koje planiramo preduzeti u 2012. i 2013. , a da bismo osigurali da ciljevi iz stand by aranžmana budu postignuti." Iz ovog teksta sasvim je jasno da se radi o Dodatnom pismu namjere, kao i da se ovo pismo oslanja na prvo Pismo namjere iz septembra 2012.

Ova dva pisma se mogu naći na sljedećim službenim stranicama MMF-a:

<http://www.imf.org/external/np/loi/2012/bih/091112.pdf> (Pismo namjere od 11.

septembra) i <http://www.imf.org/external/np/loi/2012/bih/120612.pdf> (Dodatno pismo namjere od 6. decembra). Ukoliko postoje neke nejasnoće u vezi sa ovim pismima, njihovim datumima, sadržajem i broju, pozivamo Vijeće ministara da se obrati MMF-u, a ne Fondaciji CPI, s obzirom da je pisma objavio upravo MMF. Informaciju u ovim pismima Fondacija CPI prenosi u interesu građana.

U svom saopštenju od 4. januara 2013. ured g. Bevande tvdi da “novo Pismo namjere ne postoji i da je jedino Pismo namjere ono koje je upućeno Odboru direktora MMF-a i koje je pregovarano u novembru 2012. godine između Fiskalnog





Centar za zastupanje  
građanskih interesa

vijeća BiH i MMF-a i koje je potpisano i odobreno u decembru 2012. godine”, što je hronološki nelogično i netačno jer je MMF još u septembru objavio prvo Pismo namjere i što je moguće utvrditi u prvom gore navedenom dokumentu, a informaciju o tome su, između ostalih, prenijele i sve relevantne medijske kuće u BiH.

Namjera Fondacije ni u jednom momentu nije da svojim istupima podriva rad bilo koje institucije, nego da doprinese transparentnosti i otvorenosti svih nivoa vlasti. U tom smislu, kao i do sad, dajemo punu podršku svim reformskim procesima koji su u interesu građana i koji su na adekvatan način izneseni u javnosti. Nadalje, smatramo da su ultimatumima kojima smo izloženi od strane ureda Predsjedavajućeg Vijeća ministara nakon našeg jučerašnjeg saopćenja potpuno neprihvatljivi i neprikladni za odnos države i civilnog društva.

Fondacija CPI - Centar za zastupanje građanskih interesa, Sarajevo

*Za dodatne informacije molimo kontaktirajte našu saradnicu Amru Bilalović, mob br 061 683 032, ili na email: amra@cpi.ba.*

CPI je nevladina, neprofitna organizacija koja prikupljanjem, analizom i objavljivanjem podataka od interesa za građane, te njihovom promocijom, aktivno podržava izgradnju civilnog društva. Fondacija CPI nastoji omogućiti da javni i verificirani podaci važni za građane BiH budu lako dostupni u kontekstu i na način kojeg može razumjeti građanin koji se profesionalno ne bavi javnom administracijom i javnim finansijama.

